

余有方外之友曰道開扁公長身疎眉風儀高秀能詩好石門能畫宗巨然師事蒼雪澈汰如河通賢首慈恩二宗旨歸出世爲人分席開演講講圓覺于虎丘講涅槃于華亭講楞嚴于武塘妙義雲委如瓶瀉水壬辰六月自檣李歸虎丘東小菴屬疾數日邀蒼師坐榻前手書訣別有曰一事無成五十二載一場懨懨雙手拓開志氣清明字畫端好校衣歛容擲筆而逝人言道開故清淨僧頻年好遊族姓徵逐竿牘熱惱煎煮寢疾彌留臨終正定因果超然此則吾之所不識也余曰固也盍以生平考之道開吳門周氏子

父其鄉書生早死舅奪母志投城東俗僧出家薙染十年猶爲啞羊僧遊武林聽講于聞谷禪師未竟聽相宗于靈源論師晝則乞食屠肆夜則投宿木棧孤蓬殘漏風號雪壓束縵篝火一燈如燐指僵手塚墨堅筆退燈炮就枕口喃喃如夢囈不休由是貫穿論疏旁搜外典所至白健椎打論鼓揚眉豎目非復吳下阿蒙矣還吳參蒼師于中峯一見器異命爲維那楞嚴席罷留侍巾鉢六年蒼法二師約踐更講大疏寔尸勸請法師至華山命爲監院及其順世講堂建塔院刻續高僧傳覆視遺囑若搃券契蓋蒼師之傳